

Qalam

Bilangan 118 Zulkaedah 1379 Mei, 1960 60 sen

Takziah dan Tahniah

Pada bulan yang lalu Duli Yang Maha Mulia Yang di-Pertuan Agong, Tuanku Abdul Rahman ibni al-Marhum Tuanku Muhammad, telah mangkat. Kemangkatan baginda adalah sangat mengejutkan dan tidak disangka-sangka - *inna lillāhi wa innā ilayhi rāji‘ūn*. Kita mengucapkan sangat-sangat berdukacita atas kemangkatan baginda yang banyak jasanya terhadap negara dan tanah air. Mudah-mudahan Allah akan mencucuri rahmat kelimpahan ke atas roh baginda, *Āmīn*.

Dengan kemangkatan baginda, maka Timbalan Yang di-Pertuan Agong, Yang Maha Mulia Tuanku Hisamuddin Alam Shah, Sultan Selangor telah dilantik menjadi Yang di-Pertuan Agong. Dengan lantikan baginda menjadi Yang di-Pertuan Agong, maka seluruh umat Islam khasnya sangat-sangat bersukacita kerana baginda adalah seorang Sultan Melayu yang sangat taat kepada ajaran agamanya.

Orang-orang Islam cukup mengetahui tentang keadaan baginda ini dan kerana itulah umat Islam berharap keutamaan dalam pelajaran agama, di dalam rakyat baginda sangat diharap dapat dilaksanakan dengan sepenuhnya dan lebih meluas.

* * *

Jagalah Persatuan

Terbit daripada siaran Muhammadiyyah Singapura, maka banyak timbul perkara bidas-membidas yang tidak diingini timbul sehingga pensyarah-pensyarah agama di dalam syarahan mereka telah

membidas-bidas dan menyindir-nyindir batang tubuh orang. Untuk menimbulkan rasa kebencian di antara orang-orang Islam sesama Islam. Cara ini, jika berkepanjangan sudah tentu kelak akan membawa riak-riak yang tidak diingini.

Muhammadiyyah menerbitkan suatu risalah yang di dalamnya telah membawa perkara-perkara perselisihan faham di dalam perkara agama (perkara khilafah) dengan suatu cara yang tidak mudah diterima ramai. Cara mereka menerbitkan risalah itu dipandang oleh sebahagian orang bukanlah dengan suatu cara yang akan memberi faedah sebagaimana mestinya kepada masyarakat tetapi caranya adalah boleh menerbitkan perkara-perkara yang menimbulkan salah ambilan orang.

Sepatutnya *Muhammadiyyah* hendaklah menggunakan cara-cara yang bijaksana dalam menyampaikan pengertian mereka. Mereka seharusnya hendaklah menyusun suatu cara di dalam siarannya dengan rapi dan teratur serta menggunakan hujah-hujah yang maakul dengan tidak menyentuh pendapat orang lain apalagi meletakkan sesuatu cabaran kecekaman ke atas orang lain terasa akan pedihnya akan apa yang dikatakan atau disebut oleh risalah Muhammadiyyah itu.

Kurang membawa kebijaksanaan dalam menghadapi umat adalah suatu cara yang kurang baik. Sama ada Muhammadiyyah atau pun lainnya masing-masing hendaklah ingat bahawa tanggungjawab yang besar kepada mereka ialah merapatkan *ukhuwwah* atau persaudaraan sesama Islam. Adalah sangat-sangat dilaknat bagi seseorang yang memecahkan persatuan umat Islam. Kerana itu mana-mana pihak pun hendaklah menjaga persatuan itu.

Mana-mana ada didapati pertengangan maka masing-masing hendaklah menjauhkan perkara itu. Kalau hendak menerangkan terangkanlah dengan cara atau kaedah yang baik, tidak terus menyalahkan orang lain. Berilah orang ramai dengan perasaan yang tenang memikirkannya. Dengan cara-cara ini maka dapatlah masing-masing memberi pandangan dengan tidak sekali-kali menyentuh atau menyakiti orang lain. Dengan ini juga orang ramai

sambungan pada muka 5

Dari Sebulan ke Sebulan

Dewan Rakyat Persekutuan Tanah Melayu dengan sebulat suara telah memberi mandat kepada Perdana Menteri Tengku Abdul Rahman, untuk membawa soal kekejaman kerajaan Amerika Selatan, dalam Persidangan Perdana-perdana Menteri Commonwealth di London pada 3 hari bulan Mei ini.

Usul yang telah dikemukakan oleh Tengku dan telah diluluskan oleh Dewan Rakyat itu seperti berikut:

“Bahaha dewan ini, sungguhpun mengakui dengan penuh tanggungjawab kerajaan Afrika Selatan menjalankan dasar dalam negerinya, tetapi sesuai dengan sikap kerajaan

Persekutuan Tanah Melayu mengenai pencabulan hak-hak asasi manusia sebagaimana contoh yang ditunjukkan terhadap pencabulan di Tibet, adalah mengutuk pembunuhan dan kekejaman yang dilakukan terhadap orang-orang Afrika oleh polis Afrika Selatan dalam menjalankan dasar membeza-bezakan warna kulit, dan bahawa dewan ini menyokong penuh apa juga tindakan tegas kerajaan yang selayaknya dalam soal ini”.

Tengku Abdul Rahman telah mensifatkan tindakan kerajaan Afrika Selatan suatu perbuatan yang zalim, tidak berperikemanusiaan, dan “tangannya berlumuran dengan darah manusia yang tidak berdosa....!”

Tatkala menjawab pihak Socialist Front yang meminta supaya kata-kata mengenai peristiwa Tibet dicabut dari usul itu, Tengku berkata: “Usul saya itu terang dan nyata. Masalah-masalah Afrika Selatan dan Tibet itu adalah sama”.

Dr. Ismail Menteri Luar, telah juga menjawab pihak Socialist mengenai peristiwa Tibet. Dr. Ismail berkata: Tidakkah penindasan Komunis Kuning di Tibet itu bererti juga penindasan hak-hak asasi?

* * *

Dalam perjumpaan hari raya *Jam ‘iyah al-Da‘wah al-Islāmiyyah*, Tuan Haji Wanjur, Setiausaha *Jam ‘iyah*, tatkala bercakap mengatakan, bahawa pertubuhan Muhammadiyah adalah sebuah pertubuhan yang mesti ditentang kerana ia bukannya termasuk di dalam Ahl al-Sunnah wa al-Jamā‘ah. Demikian juga keadaannya *Muhammadiyah* di Jawa adalah mesti ditentang! Di dalam perkataannya itu terang ia menyebutkan bahawa seolah-olah pertubuhan itu pertubuhan yang bukan Islam dan sama keadaannya seperti Qadiani. Mendengar

Rencana Pengarang

Sambungan dari muka 3

Terkawal daripada mengambil sesuatu langkah mengikut perasaan yang boleh menimbulkan perkara-perkara yang tidak diingini oleh masyarakat Islam.

Pendek kata pemimpin-pemimpin Islam terutamanya pensyarah-pensyarah agama, mustahak berjaga-jaga di dalam hal seperti ini. Mereka mustahak benar menjauhkan perkara-perkara yang boleh menimbulkan perselisihan dan perbalahan. Berilah kebebasan kepada sesiapa pun menyatakan pendapatnya. Ingatlah! Dalam memberi pendapat itu janganlah menyalahkan orang lain. Dengan cara ini sudah tentu kelak kita akan dapat mengekalkan persatuan kita. Tetapi kalau dalam memberi pendapat itu kita memukul orang lain, maka sudah tentu perpecahan akan timbul.

Kesan perpecahan sudah kita lihat. Korbannya telah banyak kerana itu, selain daripada kita ditegah mengadakan perpecahan maka sangat mustahak kita mencari jalan untuk mengekalkan persatuan adanya.

sambungan pada muka 45